

Tusagassiuutitut tapiissuteqartarneq pillugu Namminersorlutik Oqartussat nalunaarutaat nr. 19, 8. oktober 2015-imeersoq

Kulturikkut ingerlatsineq sunngiffimmilu sammisasaqartitsineq pillugit Inatsisartut peqqussutaanni nr. 10, 21. maj 2002-meersumi § 31 naapertorlugu aalajangersarneqarpoq:

Kapitali 1 *Atuuffia*

§ 1. Aningaasaliissutit aningaasanut inatsimmi aalajangersarneqartut iluanni Naalackersuisut suliniutitut inuiaqatigiinnut paasissutissat allatat siammaannissaannik siunertaqartunut tapiissuteqartarput, tamatumani ilaatillugit demokratiskiusumik oqallinneq tusagassiuutitigullu tamatiguussuseq.

§ 2. Tapiissutit tunniunneqassapput suliniutip pilersinnissaanut inerisarnissaanulluunniit.
Imm. 2. Suliniutitut isigineqarpoq ingerlassaq piffissami killilikkami ingerlanneqartoq, aalajangersimasunik anguniagaqarfiusut inerneqartussanulluunniit.

Imm. 3. Suliniutit tusagassiortutut nammineerluni suliaasimasut siammaannissaannik siunertaqartut tapiiffigineqartassapput, tamatumunnga ilanngullugit misissueqqaarnerit.

Imm. 4. Tusagassiorfiit sumulluunniit attuumassuteqanngitsut pioreersut allatut ingerlatsilernissaat ineriartortinnissaalluunniit siunertaralugu suliniutit ineriartortinnissaannut tapiissuteqartoqartassaaq.

Imm. 5. Tapiissutit tusagassiuuteqarnermik ingerlatsisup suliffianut ingerlatsinermut tapitut, nalinginnaasumik suliaqarnermut tapiissutitut tunniunneqarsinnaanngillat.

§ 3. Tusagassiuutitut arlaannaanulluunniit attuumassuteqanngitsunit, naqitanik imaluunniit allatanik internet-ikkoortitanik nutaarsiassaqartitsisunit ullutsinneersulerisunillu, suliniutitut aallartitanut ingerlanneqartunullu tapiisoqartassaaq, taakku imarisaat malinnaasunut kalaallinut naatsorsuunneqarlutik aaqqissugaappata, imaluunniit nunani allani pisunik Kalaallit Nunaannut naleqqussaaneruppata.

Imm. 2. Tusagassiuuteqarfiit arlaannaanulluunniit atanngitsutut isigineqassapput:
1) pisortanit, suliffeqarfinnit imaluunniit ingerlatseqatigiiffinnit pisortanit aningaasalersorneqartunit assigisaannilluunniit tamakkiisumik ilaannakortumilluunniit pigineqarunik imaluunniit

2) tusagassiuuteqarfiup minnerpaamik affaa sulisitsisut, sulisartut, suleqatigiit soqutigisaqatigiilluunniit kattuffiinit pigineqarpat, taakkununnga ilanngullugit politikkikkut partiit.

Imm. 3. Tusagassiuutitut naqitatut isigineqarput aviisit, atuagassiat saqqummersitalluunniit taakkununnga assingusut.

Imm 4. Tusagassiutitut allatatut internet-ikkoortitatut isigineqarput internetikkut tusagassiutit allataanerusut. Assitaliinerit nipitaliinerillu annikinnerusumik ilaasinnaapput, allatamik erseqqissaataagunik.

Kapitali 2

Tapiissutisinissamut piumasagaatit

§ 4. Suliniutinut, nalunaarutip atuuffiata iluaniittunut, suliniutip tapiiffigineqarsinnaatitaasup missingersuutaasa 70 %-iat angullugu tapiisoqarsinnaavoq, §§ 5-6-mi piumasagaatit piviusunngortinneqarsimappata.

§ 5. Tapiissutinik qinnuteqartoq tassaassaaq

- 1) tusagassiivik namminersortoq, tak. imm. 2,
- 2) piffissaq tapiiffigineqartoq tamaat akisussaasumik aaqqissuisoqartoq,
- 3) aaqqissueqataasunik sulisoqassaaq, akisussaalluni aaqqissuisoq peqatigalugu minnerpaamik ukiumut suliffiit pingasut amerlaqataannik, qinnuteqartup suliffik ukiumi qinnuteqarfiusumi imaluunniit ukioq qinnuteqarfik sioqqullugu ukiumi pilersissimangippagu,
- 4) namminerisamik tusagassiortutut sulianik saqqummiisoq, annermik qulequttanik politikkimut, inuiaqatigiinnut kulturimullu tunngasunik imaqartunik, taakkualu minnerpaamik affaat tassaassallutik saqqummiussat aaqqissukkat, pilerisaarutit ilaatinngit, qulequttat tamatigoortut iluanni allaaserisatut iluseqarlutik, soorlu nunami namminermi pissutsinut, nunanut allanut, kulturimut najukkamilu pissutsinut tunngasuullutik, aamma nutaarsiassanik ullutsinneersunik sammisaqarlutik,
- 5) atuisunut siamasissumik saaffiginnittuussaaq, taamaallaallu inuussutissarsiortunut imaluunniit assigiimmik sulialinnut, sulisitsisut, sulisut imaluunniit assigiinnik suliallit kattuffiitut, partiinut suliffeqarfinniluunniit assigiinnigitsuni sulisunut aalajangersimasunut saaffiginnittuussanani,
- 6) minnerpaamik qaammammut ataasiarluni saqqummertassaaq, imaluunniit ullut tamaasa nutarterneqartarluni – tamatumani internet-ikkut tusagassiineq pineqarpat,
- 7) nuna tamakkerlugu atuisullu assigiimmik atugassaqartillugit saqqummiunneqassaaq, tamanillu takuneqarsinnaalluni,
- 8) annikinnerpaamik kalaallisut saqqummissaaq
- 9) Kalaallit Nunaanni angerlarsimaffeqassaaq.
- 10) tusagassiormi suliniutip niuernermi pilersaarummi aningaasatigut imminut nappassinnaanera takutinneqassaaq aamma
- 11) tapiissuteqarnermi piumasagaataasinnaasut eqqortinneqassapput.

Imm. 2. Tusagassiutit namminersortutut isigineqassaaq, tak. imm. 1, nr. 1, namminerisaminik aaqqissuisuunekaruni. Tusagassiutinit allatanit aammattaaq piumasavoq, naqinneqarnerisa amerlassusaat immikkut nalunaarsorneqarsinnaassasut, aamma immikkut pisartagarineqarsinnaassasut.

§ 6. Suliniut tapiiffigineqarsimasoq, suli marloriarluni tapiiffigineqaqqissinnaavoq, suliniut naammassereersimangippat.

Imm. 2. Tusagassiiuteqarfik ukiumi ataatsimi suliniutinut ataatsimik amerlanerusunut tapiissutininik qinnuteqaruni, qinnuteqaatit pingaarnersiorlugit nassiutissavai.

Kapitali 3

Tapiissuteqartarnermut ataatsimiititaliaq

§ 7. Nalunaarut una naapertorlugu tusagassiuutinut tapiissutininik qinnuteqaatinik suliarinnittartussamik tapiissuteqarnissamillu aalajangiisartussamik ukiumut ataasiarluni ataatsimiittartussamik tapiissuteqartarnermut ataatsimiititaliamik Naalakkersuisut pilersitsissapput.

Imm. 2. Ataatsimiititaliap suleriaasissaanik Naalakkersuisut aalajangersaassapput.

Imm. 3. Ataatsimiititaliap aalajangigai allaffissornermi oqartussanut allanut suliakkiissutigineqarsinnaanngillat.

Imm. 4. Kultureqarnermut Naalakkersuisoqarfimmit ataatsimiititaliamut allatseqarfik ingerlanneqassaaq.

§ 8. Ukuninnga innersuussereernikkut Naalakkersuisunit toqqarneqartartunik tapiissuteqartarnermut ataatsimiititaliaq pingasunik ilaasortaqaassaaq:

- 1) Ilisimatusarfik, ilaasortamik ataatsimik inuiaqatigiilerinermi ilisimasaqartumik innersuussisartoq,
- 2) Tusagassiortut Kattuffiat, ilaasortamik ataatsimik tusagassiuutilerineramik ilisimasaqartumik innersuussisartoq,
- 3) Kalaallit Nunaanni inatsisilerituut kattuffiat, ilaasortamik ataatsimik ingerlatsinermi inatsisinik aningaasaqarnermillu ilisimasaqartumik innersuussisartoq.

Imm. 2. Ataatsimiititaliami ilaasortat 18-inik ukioqalereersimassapput aammalu Inatsisartunut, Folketingimut kommunalbestyrelsinullu ilaasortaassanatik qinigassanngortissimassannatilluunniit, piffissamiillu innersuunneqarfimmit ukiuni tallimani kingullerni Kalaallit Nunaanni tusagassiuutinut aningaasatigut atassuteqarsimassanatik. Ataatsimiititaliami ilaasortat tusagassiuutinut aningaasatigut taamatut atassuteqalersut ataatsimiititaliamit ingerlaannaq tunuassapput, tamassumalu kingorna imm. 1 naapertorlugu ilaasortamik nutaamik toqqaasoqassalluni.

Imm. 3. Ilaasortat piffissamut ukiunut marlunnut toqqarneqartassapput, tak. § 18. Ilaasortat toqqaqqinneqarsinnaapput.

Imm. 4. Tapiissuteqartarnermi ataatsimiititaliami ilaasortat Inatsisartunut Naalakkersuisunut il.il. ilaasortat akissarsiaat il.il. pillugit Inatsisartut inatsisaanni kapitali 7-imi malittarisassat malillugit akissarsiaqassapput, ullormusiaqassalutik angalanermilu aningaasartuutinik akiliunneqartassallutik.

Kapitali 4

Qinnuteqarnermi periuseq

§ 9. Tapiissutinik qinnuteqaat tapiissuteqartarnermut ataatsimiititaliap allatseqarfianut tunniunneqareersimassaaq, tak. § 7, imm. 4, 1. maj – ullorsiutit malillugit ukiumi suliniutip aallartiffiani, taamaattoq tak. § 17.

Imm. 2. Suliniutit tapiissutinik qinnuteqaatigisat tamarmik immikkut qinnuteqaasiunneqassapput.

Imm. 3. Qinnuteqaammut ilanngunneqassapput:

- 1) suliniutip allaasereqqissaarnera,
- 2) aningaasartuutissatut isertitassatullu missingersuutit aamma aningaasalersuinissamut pilersaarut aamma
- 3) tusagassiuutip qinnuteqartup ullorsiutit malillugit ukiumi siuliani naatsorsuutai, tusagassiuut ukiumi qinnuteqarfiusumi pilersinneqarsimangippat.

Kapitali 5

Naatsorsuutit kukkunersemiinerlu

§ 10. Suliniutip naammassineraniit kingusinnerpaamik qaammatit pingasut qaangiunneranni tapiiffigineqartut, tapiissutit atornerisa naatsorsuutaat atsiukkat Kultureqarnermut Naalackersuisoqarfimmumt nassiutissavaat.

Imm. 2. Naatsorsuutit kukkunersemiuisumit naalagaaffimmit akuerisaasumit imaluunniit kukkunersemiuisutut nalunaarsukkamit kukkunersemiorneqarsimassapput, kr. 150.000-inik qaangerlugilluunniit tapiissutisiarineqarsimappata.

§ 11. Kukkunersemiineq kukkunersemiinermi ileqqorissaarneq naapertorlugu ingerlanneqassaaq.

Imm. 2. Kukkunersemiinermi ilaatigut makku misissorneqassapput:

- 1) Tapiissutit siunertamut atorneqarsimanerat.
- 2) Tapiinermi piumasaqaatit piviusunnngortinneqarsimanersut.
- 3) Suliniummut naatsorsuutit eqqortuunersut, pingaarutilinnik kukkuneqaratik amigaateqaratillu.
- 4) Tapiiffigineqartoq aningaasaqarnikkut naammaginartumik mianerinnissimangersoq, taamaalillunilu suliniutip piviusunnngortinnissaa pisariaqanngitsunik aningaasartuutaanani.
- 5) Paasissutissat, tapiiffigineqartup Kultureqarnermut Naalackersuisoqarfimmumt nalunaarutigisai, uppersaatissaqarnersut.

Imm. 3. Kultureqarnermut Naalackersuisoqarfik naatsorsuutinik ataasiakkaanik nakkutilliilluni misissuisassaaq.

§ 12. Tapiissutit kr. 150.000 ataappatigit kukkunersemiuisoqassanngilaq.

Imm. 2. Tapiissutisisup naatsorsuutit atsiornersigut uppersassavaa, naatsorsuutit eqqortuusut tapiissutillu siunertamut atorneqarsimasut.

Imm. 3. Kr. 150.000 ataallugit tapiissutisisoq tapiisartunit allamit allanilluunniit tapiiffigineqarsimaguni, tapiissutisisoq tamanna pillugu Kultureqarnermut Naalackersuisoqarfimmut uppersaatinik nassitsissaaq.

Imm. 4. Kultureqarnermut Naalackersuisoqarfiup tapiissutisisoq peqqusinnaavaa, suliniutip naammassinerani immersugassat nalunaarfissat Naalackersuisoqarfimmit suliarineqarsimasut immersoriarlugit nassiteqqullugit.

Kapitali 6

Allaffissornikkut aqutsineq, nakkutillineq pineqaatissiissutillu

§ 13. Tapiissuteqartarnermik aaqjissuussinermik allaffissornikkut aqutsineq Kultureqarnermut Naalackersuisoqarfimmit tapiissuteqartarnermut ataatsimiititaliamut allatseqarfittut ingerlanneqassaaq.

Imm. 2. Paasissutissat tapiissuteqarnermut tunngaviusut annertuunik allannguuteqarpata tapiissutisisoq Kultureqarnermut Naalackersuisoqarfimmut ingerlaannaq nalunaaruteqarnissamut pisussaaffeqarpoq.

§ 14. Tapiissuteqartarnermut ataatsimiititaliap tapiissutisisut tapiissutinik atuinerat aamma nalunaarut manna naapertorlugu tapiissutit pillugit malittarisassanik tapiissutisinissamullu piomasagaataajunnartunik maleruaanerat nakkutigissavaa.

Imm. 2. Tapiissuteqartarnermut ataatsimiititaliap tapiissutisisoq, paasissutissanik suliniummut tapiiffigineqartumut naleqqiullugu nakkutilliinissamut pisariaqartunik, qaqugukkulluunniit piniarfigisinnaavaa.

§ 15. Tapiissuteqartarnermut ataatsimiititaliap tapiissutinik tunniussineq unitsissinnaavaa, tapiissutisinissamut tunngaviit atorunnaartutut nalilerneqarpata.

Imm. 2. Tapiissuteqartarnermut ataatsimiititaliap tapiissutit tunniunneqartut tamakkiisumik ilaannakortumilluunniit uterteqqusinnaavai, ima pisoqartillugu:

- 1) Tapiissutisisup tapiissutisinissamut piomasagaatit eqquutsikkunnaarpagit, tamatumunnga ilanngullugu ingerlanniakkattut naatsorsuutigisat ingerlanneqannginnerat.
- 2) Tapiissutisisup tapiinissamut piomasagaataajunnartut maleruanngippagit.
- 3) Tapiissutisisoq kukkusunik eqqunngitsunilluunniit paasissutissiisimappat imaluunniit qinnuteqarnermini uppersaasiinermiluunniit paasissutissat pingaarutillit nipangiutiinnarsimappagit.
- 4) Tapiissutisisup paasissutissat naapertuuttut nassiukkumangippagit, tamatumunnga ilanngullugit naatsorsuutit naliliinermilu immersugassaaq.
- 5) Tapiissutisisup aningaasat tapiissutinik qinnuteqarnermini missingersersuutaasunik ikinnerusut atorsimappagit.

Kapitali 7

Atuutilersitsinermut ikaarsaariarnermullu aalajangersakkat

§ 16. Nalunaarut manna tamanut ilisimatitsissutigineqarnermini atuutilissaaq.

§ 17. Ullorsiutit malillugit ukiumi 2015-imi suliniutinut tapiissutinik qinnuteqaatit Kultureqarnermut Naalakkersuisoqarfimmeeriissapput kingusinnerpaamik 1. november 2015.

§ 18. Tapiissuteqartarnermut ataatsimiititaliaq piffissamut 15. oktober 2015-imiit 30. september 2017-imut siullermeerluni toqqarneqassaaq.

Namminersorlutik Oqartussat 8. oktober 2015



Nivi Olsen



Mikael Kristensen